

于湖題襟集
二



于湖題襟集

(二)

袁昶編錄

于湖題襟集

黃公度詩一卷

由上海啟行至長崎

浩浩天風快送迎。隨槎萬里賦東征。使星遠曜臨三島。帝澤旁流徧裨瀛。大鳥扶搖搏水上。神龍首尾挾舟行。馮夷歌舞山靈喜。一路傳呼萬歲聲。

滿城旭影曜紅旗。神武當年此肇基。竿木纔平秦世亂。衣冠創見漢官儀。中原舊族流傳遠。長崎多有勝朝遺老後裔四海同家聚會奇。此土此民成此國。有人盡日倚欄思。

陸軍士官學校開校禮成賦呈有栖川熾仁親王

爲將不知兵。是謂卒子敵。不教驅之戰。豈能出以律。桓文節制師。蘇張縱橫策。制勝非有他。所貴在練習。日本二十年。本以武立國。幕府值季世。犬戎迭相逼。賢豪爭勤王。蔚成中興辟。環顧五部洲。滄海不可隔。函關一丸泥。勢難復閉壁。勇夫且重閉。豈曰偃兵革。天孫茅纒稍。高麗鐵鑄的。古豈無利器。今合借他石。近年歐羅巴。兵法蓋無匹。廣輪四海圖。上下千年籍。擇長以爲師。悉命譯人譯。廣廈千萬間。多士宅爾宅。羣萃而州處。乃受觀摩益。使指固藉臂。覆足固藉翼。得一良將才。勝百連城壁。是日營門開。軍容荼火赫。賢王代臨軒。客卿咸就席。組練簡一千。距躍習三百。拐馬熟連環。飛礮鳴霹靂。亦有輕氣球。凌風騰千尺。

隼人與相撲。餘技及刺擊。粲粲西人服。竦立咸屏息。王告汝多士。曷哉宜勉力。刃當磨厲須。雖乃脫穎出。千日可不用。兢惕在朝夕。王告汝多士。彫虎在有北。養爾民脂膏。爲民出鋒鏑。爾能扞城民。畀汝公侯伯。多士曰唯唯。拜手受詔敕。使者覩茲禮。歡忻日屢拭。念余捧載書。相見藉玉帛。同在亞細亞。自昔鄰封輯。譬若輔車依。譬若犄角立。所恃各富強。乃能相輔弼。同類爭奮興。外侮自潛匿。解甲歌太平。傳之千萬億。

游箱根

危塗遠盤紆。徑仄鳥迹絕。一步不敢前。雙足若被刖。人呼兜籠來。縱橫寬尺八。腳手垂郎當。腰背盤曲折。與人出裸國。皮皺龜兆裂。螭蛟繡滿身。橫胸施絳袂。兩肩乍擡舉。雙杖互扶挈。前枝後更撐。仰攀俯若跌。有如蟻旋磨。又似蛇出穴。跣跣上竹鮎。蠢蠢爬沙鼈。噫風竹筒吹。汗雨蒸甌泄。勞倦時一歌。鄉音鳥嘲哢。烟樹繞千迴。風花眩一瞥。峭壁俯絕壑。旁睨每橋舌。四山呼無人。一墮便永訣。畏途甯中止。弛擔屢更迭。直窮絕頂高。始覺天地闊。

羣峰插雲中。結屋峰頭住。濛濛萬雲海。憑空無寸土。開窗起看雲。迷茫若無覩。一雲忽飛來。一雲不肯去。一雲幻作龍。盤旋繞屋住。關窗急遮欄。攢隙細如縷。須臾寒破屋。真氣滿庭戶。解裝張行囊。呼童共撈取。大風捲地來。團作黑烟聚。隱隱聞雷聲。乍似嬰兒怒。遙知百萬家。已灑三尺雨。我方跂脚眠。夢騎赤龍舞。直傾天河水。遠向并豫注。側身起西望。夢墮雲深處。時山西河
南大旱

舉國無名川。一湖何混漾。環抱三百里。下窺五十丈。神武開闢來。亘古無消長。汎泉日穴出。汎流失歸向。

一碧湛空明。萬象絕依傍。昂頭只日月。兩輪互磨盪。我來駕一舟。杳茫迷所往。謂是滄溟遊。乘風破巨浪。何圖衆山頂。乃泛海蕩蕩。關東昔豪傑。割地爭霸王。湯池據此險。漆城莫敢上。邇來司農官。又作填海想。鑿脈乾此湖。可得千沃壤。紛紛校得失。堯桀我俱忘。且作烟波徒。容與打雙槳。羣山若堂防。依巖各構屋。家家爭調水。曲筧引修竹。泠泠滴簷角。汨汨出巖腹。曉鴉猶未興。既有遊人浴。東屋鳴寒絃。西屋門棋局。南屋垂釣竿。北屋羅簡牘。蛟豪展涼簟。鶴氅披輕服。點白茶始嘗。堆紅果初熟。蕃舶從海來。蒲萄泛新綠。洪崖揖浮邱。簫史媚弄玉。雞犬亦飛昇。熊魚各得欲。人生貴行樂。矧此神仙福。纏腰更騎鶴。辟俗還食肉。平生煙霞心。奈此桑下宿。行攜桃源圖。歸我篋管谷。

流求歌

白頭老臣倚牆哭。頰髻斜簪衣慘綠。自嗟流蕩作波臣。細訴興亡溯天蹕。天孫傳世到舜天。海上蜿蜒一脈延。彈丸雖號蕞爾國。問鼎猶傳七百年。大明天子雲端裏。自天草詔飛黃紙。印綬遙從倭國頒。衣冠幸不朱崖棄。使星如月照九州。王號中王國小球。英蕩雙持龍虎節。繡衣直指鳳麟洲。從此包茅勤入貢。艷說扶桑繭如甕。曾豪入學還請經。天王賜襲仍歸贈。爾時國勢正稱強。日本猶封異姓王。只戴上枝歸一日。更無尺詔問東皇。黑面小猴投袂起。謂是區區應余畀。數典橫徵貢百牢。兼弱忽然加一矢。鯨鯢橫肆氣吞舟。早見降幡出石頭。大夫拔舍君銜璧。昨日蠻王今楚囚。畏首畏尾身有幾。籠鳥惟求寬一死。但乞頭顱萬里歸。安將口血羣臣誓。歸來割地獻商於。索米仍輸歲歲租。歸化雖編歸漢里。畏威終奉嚇蠻書。

一國從茲臣二主。兩姑未覺難爲婦。稱臣稱姪日爲兄。依漢依天使如父。一旦維新時事異。二百餘藩齊改制。覆巢豈有完卵心。顧器略存投鼠忌。公堂纔錫藩臣宴。鋒車竟走降王傳。剛聞守約比交鄰。忽爾廢藩夷九縣。吁嗟君長檻車去。舉族北轅誰控訴。鬼界明知不若人。虎性而今化爲鼠。御溝一帶水溶溶。流水花枝蝴蝶紅。尙有丹書珠殿挂。空將金印紫泥封。迎恩亭下蕉陰綠。相逢野老吞聲哭。旌麾莫覩漢官儀。簪纓未改秦衣服。東川西川弔杜鵑。稠父宋父泣鸚鵡。興滅曾無翼九宗。賜姓空存殷七族。幾人脫險作逋逃。幾次流離呼伯叔。北辰太遠天不聞。東海雖枯國難復。氍毹大長來調處。空言無施究何補。只有流求卹難民。年年上疏勞疆臣。

八月十五夜太平洋舟中望月作歌

茫茫東海波連天。天邊大月光團圓。送人夜夜照船尾。今夕倍放清光妍。一舟而外無寸地。上者青天下黑水。登程見月四面明。歸舟已歷三千里。大千世界共此月。世人不共中秋節。泰西紀歷二千年。只作尋常數圓缺。舟師捧盤登舵樓。船與天漢同西流。虬髯高歌碧眼醉。異方樂祇增人愁。此外同舟下床客。夢中暫免供人役。沈沈千蟻趨黑酣。交臂橫肱睡狼藉。魚龍悄悄夜三更。波平如鏡風無聲。一輪懸空一輪轉。徘徊獨作巡簷行。我隨船去月隨身。月不離我情倍親。汪洋東海不知幾萬里。今夕之夕惟我與爾對。影成三人。舉頭西指雲深處。下有人家億萬戶。幾家兒女怨別離。幾處樓台作歌舞。悲歡離合雖不同。四億萬衆同秋中。豈知赤縣神州外。美洲以西日本東。獨有一家敬孤蓬。此客出門今十載。月光漸照鬢毛

改觀。日曾到三神山。乘風竟渡大瀛海。舉頭只見故鄉月。月不同。時地各別。卽今吾家隔海遙相望。彼乍東升。此西沒。嗟我身世猶轉蓬。縱遊所至如鑿空。禹跡不到夏時變。我遊所歷殊未窮。九州腳底大球背。天胡置我於此中。異時汗漫安所抵。搔頭我欲問蒼穹。倚欄不寐心憧憧。月影漸變朝霞紅。朦朧曉日生於東。

舟中驟雨

極天惟海水。水際忽雲橫。雲氣隨風走。風聲挾雨行。鵬垂天欲墜。龍吼海齊鳴。一霎風吹去。滄波萬里平。到香港

水是堯時日。夏時衣冠。又是漢官儀。登樓四望真吾土。不見黃龍上大旗。

夜泊

一行歸雁影零丁。相倚雙鳬睡未醒。人語沈沈篷悄悄。沙光淡淡竹冥冥。近家鄉夢心尤亟。拍枕濤聲耳厭聽。急趁天明催艣發。開門斜月帶殘星。

春夜招鄉人飲

春風漾微和。吹斷簷前雪。寒犬吠始停。衆客互排闥。出甕酒子醺。敲壁燭奴爇。花豬閒黃雞。亦足供餽餼。團坐盡鄉鄰。無復苛禮設。以我久客歸。羣起爭辯詰。初言日本國。舊是神山窟。珊瑚交枝柯。金銀眩宮闕。雲餘白傅龕。錦留太真韞。今猶驂鸞來。眼見非恍惚。予乘仙槎去。應識長生訣。靈芝不死藥。多少祕筐篋。

或言可倫坡。索地始未獲。匝月糧懼罄。磨刀咸欲殺。天神忽下降。指引示玉牒。巨鼇戴山來。再拜請手接。狂呼登陸去。礮響轟空發。人馬合一身。手秉黃金鉞。野人走且僵。驚辟鬼羅刹。卽今牛貨洲。利盡西人奪。金穴百丈深。求取用不竭。又言太平洋。地當西南缺。下有海王宮。蛟螭恣出沒。漫空白雨跳。往往魚吐沫。曾有千斛舟。隨波入長舌。天地黑如磐。腥風吹雨血。轉腸入輪迴。遺矢幸出穴。始知出魚腹。人人慶復活。傳聞浮海舟。盡裹十重鐵。疊床十八層。上下各區別。牛羊豕雞狗。萬物萃一筏。康莊九達開。周廬千戶闢。船頭逮船尾。巡行認車轍。其人好樓居。四窗而八達。千光壁瑤璃。五色紅鞞鞢。傑閣高入雲。明明月可掇。出入鬼仙閒。多具鎖子骨。曾見高緹枝。行繩若飛越。犁韃善眩人。變態尤詭譎。常聞海客談。異說十七八。太章實親見。然否待子決。諸胡飽腥羶。四族出饕餮。飢盤比塔高。硬餅藉刀截。菜香苜蓿肥。酒醯葡萄潑。冷淘粘山螻。濃汁爬沙鼈。指動思異味。諒子固不屑。古稱美鬚眉。今亦誇白皙。紫髯盤蟠虬。碧眼閃健鶻。子年未四十。鬚髮須在頰。諸毛紛繞涿。東塗復西抹。得毋逐臭夫。習染求容悅。子如誇狄強。應舉巨觥罰。謬稱夜郎大。能步禹跡闊。試披地球圖。萬國僅蟻蝨。豈非談天衍。妄論工剽竊。一唱十隨和。此默彼又聒。醉喝杯箸翻。笑震屋瓦裂。平生意氣頗。滔滔論不歇。到此窮詰屈。口箝舌反結。自作滄溟遊。積日多於髮。所見了無奇。無異在眉睫。山經伯翳知。坤圖懷仁說。足跡未徧歷。安敢遽排訐。大鵬恣扶搖。暫作六月息。尙擬汗漫遊。一將耳目豁。再閱十年歸。一一詳論列。

鬱鬱山上松。呀呀林中鳥。松有蔭孫枝。鳥非反哺雛。我生墮地時。太婆七十五。明年阿弟生。弟兄日爭乳。太婆向母懷。伸手抱兒去。從此不離開。一日百摩撫。親手裁綾羅。爲兒製衣裳。糖霜和麵雪。爲兒作粬糕。髮亂爲梳頭。腳膩爲煖湯。東市買脂粉。饋面日生光。頭上盤雲髻。耳後明月璫。紅裙絳羅襦。事事女兒妝。牙牙初學語。親口教詩章。一讀一背誦。清如新炙簧。三歲甫學步。送兒上學堂。知兒故畏怯。戒師莫嚴莊。將出牽衣送。未歸躊闔望。問訊日百回。赤足足奔忙。春秋多佳日。親戚盡團聚。雙手擎掌珠。百口百稱譽。我家七十人。諸子愛渠祖。諸婦愛渠娘。諸孫愛渠父。因裙便惜帶。將縑難比素。老人性偏愛。不顧人笑侮。鄰里向我笑。老人愛不差。果然好狀貌。豔豔如蓮花。諸母背我罵。健犢行破車。上樹不停腳。偷芋信手爬。昨日探鵲巢。一跌敗兩牙。嘔血唾滿壁。盤礴畫龍蛇。兄妹呢我言。向婆乞金錢。直傾紫荷囊。滾地金鈴聞。爺娘付我耳。勸婆要加餐。金盤脍鯉魚。果爲兒下咽。伯叔牽我手。心知不相干。故故摩兒頂。要圖老人歡。兒年九歲時。阿爺報登科。劍兒大父旁。一語三摩挲。此兒生屬猴。聰明較猴多。雛雞比老雞。異時知如何。我病又老耄。情知不堅牢。風吹兒不長。那見兒扶搖。待兒勝冠時。看兒能奪標。他年上我墓。相攜著宮袍。前行張羅織。後行鳴鼓簫。豬雞與花果。一分肩挑。爆竹響墓背。墓前紙錢燒。手捧紫泥封。云是夫人誥。祖孫共羅拜。焚香向神告。兒今幸勝貴。頗知母所料。世言鬼無知。我定開口笑。大父回顧兒。此言兒熟記。一年記一年。兒齒加長矣。兒是孩提心。那知太婆事。但就兒所見。依稀記一二。太婆每出入。籠束拄一杖。後來杖挂壁。時見垂幃帳。夜夜攜兒眠。呼娘搔背蟬。展轉千搥腰。殷殷春雷響。佛前燈尙明。窗隙見月上。

大父褰簾來。懽笑時鼓掌。瑣屑及鄉鄰。譏訶到官長。每將野人語。眩作鬼魅狀。太婆悄不謦。便知婆欲睡。戶樞徐徐關。移踵車輪曳。明朝阿娘來。奉匱爲盥洗。欲飯爺捧盤。欲羹娘進匕。大父出迎醫。覲縷講脈理。咀嚼分膏藥。斟酌共量水。白兒有知識。日日見此事。謂此好日月。老少永無異。豈知三十年。光陰迅彈指。今日來拜墓。兒旣鬚滿嘴。兒今年四十六。大父七十九。所喜頗聰強。容顏類如舊。過山看松柏。不要攜杖走。拜跪不須扶。尙能奠杯酒。挂珠碧霞犀。猶是母所授。紉衣炫錦雞。新自粵西購。一手牽頰鬚。一手振袍袖。打鼓唱迎神。紅氍齊泥首。上頭爇爐烟。兩旁列鼎缶。青箬包黍粽。紅絲絡蓮藕。大父在前跪。諸孫跪在后。森森排竹筍。依依伏楊柳。新婦外曾孫。是婆定婚媾。阿端年始冠。去年已取婦。隨兄擊腰扇。阿和亦十五。長樛次當孫。此皆我兒女。青青秀才衣。兩弟名誰某。少者新簪花。捧觴前拜手。次第別後先。提抱集賤幼。一家盡偕來。只恨不見母。母在婆最憐。刻不離左右。今日母魂靈。得依太婆否。樹靜風不停。草長春不留。世人盡癡心。乞年拜北斗。百年那可求。所願得中壽。謂兒報婆恩。此事難開口。求母如婆年。兒亦奉養久。兒今便有孫。不得母愛憐。愛憐尙不得。那論賢不賢。上羨大父福。下傷吾母年。吁嗟無母人。悠悠者蒼天。

夜飲

長風吹月過江來。照我華堂在手杯。莫管陰晴圓缺事。盡懽三萬六千回。胸中五嶽撐空起。眼底浮雲一掃開。玉管銅絃兼鐵板。與君扶醉上高臺。

今別離

別腸轉如輪。一刻既萬周。眼見雙輪馳。益增心中憂。古亦有山川。古亦有車舟。車舟載離別。行止猶自由。今日舟與車。併力生離愁。明知須臾景。不許稍綢繆。鐘聲一及時。頃刻不少留。雖有萬鈞柁。動如繞指柔。豈無打頭風。亦不畏石尤。送者未及返。君在天盡頭。望影倏不見。烟波杳悠悠。去矣一何速。歸如留滯不。所願君歸時。快乘輕氣球。

朝寄平安語。暮寄相思字。馳書迅如電。云是君所寄。既非君手書。又無君默記。雖署花字名。知誰箝紙尾。尋常並坐語。未邊悉心事。況經三四譯。豈能達人意。只有班班墨。頗似臨行淚。門前兩行樹。離離到天際。中央亦有絲。有絲兩頭繫。如何君寄書。斷續不時至。每日百須臾。書到時有幾。一息不見聞。使我容顏悴。安得如電光。一閃至君旁。

開函喜動色。分明是君容。自君鏡奩來。入妾懷袖中。臨行翦中衣。是妾親手縫。肥瘦妾自思。今昔將毋同。自別思見君。情如春酒濃。今日見君面。仍覺心忡忡。攬鏡妾自照。顏色桃花紅。開篋持贈君。如與君相逢。妾有釵插鬢。君有襟當胸。雙懸可憐影。汝我長相從。雖則長相從。別恨終無窮。對面不解語。若隔山萬重。自非夢來往。密意何由通。

汝魂將何之。欲與君追隨。飄然渡滄海。不畏風波危。昨夕入君室。舉手牽君帷。披帷不見人。想君就枕遲。君魂倘尋我。會面亦難期。恐君魂來日。是妾不寐時。妾睡君或醒。君睡妾豈知。彼此不相聞。安怪相參差。舉頭見明月。明月方入扉。此時想君身。侵曉剛披衣。君在海之角。妾在天之涯。相去三萬里。晝夜相背馳。

眠起不同時。魂夢難相依。地長不能縮。翼短不能飛。只有戀君心。海枯終不移。海水深復深。難以量相思。

于湖題襟集

思舊集一卷

芳郭鈍叟編錄

奉簡重黎道兄

秀水沈曾植子培

竹堂不到幾旬餘。想見焚香淨掃除。禪誦有時還謝客。眼昏渾不廢鈔書。酒邊致語春多勝。物外真遊鑑共虛。問訊偃松新月狀。朝來步履更相於。

擬樂府四首有序

會稽李慈銘題伯

樂府之作。誼取比興。爲變風變雅之支流餘裔。時有今古情無遷轉。貴取其意而易其趣。襲其格而變其辭。明代李王描摹景嚮。笑齒已冷。而世之爲新樂府者。競構巧語。流爲俳諧。又變而失其宗。予窮居京師。辛壬之歲。朝廷多故。閒有所感。雜拈四章。辭或涉于憤世。指不離乎愛君。言者無罪。聞者足戒。後之覽者。善逆其志。當不與種桃之詠。秦婦之吟。等類同譏爾。

雞鳴歌

海雲曠曠紫皇醒。結璘流華當戶炯。可憐長夜酣歌人。壑谷沈沈半酩酊。主人意氣豪且麤。華鐙四照紅氍毹。玉驄列炬迎名姝。坐客數十飄長裾。中有一人雄髭鬚。高談豪飲傾玉壺。清商雜奏笙筑竽。主人富

貴賓歡娛。賓極歡。主大醉。起酌三台星。爲賓作十賚。小兒八坐居文昌。大兒千乘諸侯王。羣兒相貴不可當。酒百巡。燭數跋。雞鳴一聲童失色。童走告主人。主人醉怒噴。坐客屢鳥交。逡循鐘停漏。歇天下白。主人駢首入請室。可憐坐客誰最親。日望金雞采竿立。

枯魚過河泣

枯魚過河泣。何時悔復及。二句原辭借問爾魚生。何方滇池黑。水何汪洋。澌澌小鮎產。鱖魴荷花三百里。遊戲樂未央。一解魚潑刺兮飛上天。揚鬣水擊能三千。蓬瀛一躍花滿川。液池清藻浮澄鮮。天子賜顏色。蛟鰓與周旋。二解浙西浙東一千里。環以三江五湖水。魚去十洲住游尾。忽潛忽見帝心喜。三解雷轟雷馳江海昏。潢池鼃黽翻乾坤。魚化爲鵬復爲鯢。大江左右魚吐吞。鼃黽以外惟魚尊。四解揚鱗五采磨雪牙。扈從千百鱗鰈鯨。旁人不識魚。疑是龍與蛇。鼃黽斗起揚塵沙。宛轉奔迸魚不如。鰕。五解忽然網張魚就縶。市人沽酒看魚磔。刀砧在前魚啜泣。語魚不須泣。江邪浙邪盡涸竭。咄爾枯魚悔何及。六解

烏夜啼

脰脰膊膊烏羣飛。御史府中列柏棲。朝來匿景棄夜啼。一烏啼向曙。羣烏問何怒。云昨有黃雀飛鳴公車署。黃雀萬里穿蒿蓬。銜花直達明光宮。主人覩花感雀意。金鈴繫雀穿花叢。烏言百鳥自成列。鳳凰不能私雀秩。只聞鳩隼居上林。不許鷦鷯傍堂密。黃雀一心惟報恩。飲啄風露甘邱樊。忽遭彈射誰敢冤。由來反舌憎人言。

君馬黃

君馬黃。青絲絡。頭生輝光。君馬白。錦障連錢。驕玉埒。汗血不必求。胡中鑄式不煩召。良工尋常牧廐取。不盡牽來皆號驟。與龍今日貢六馬。明日獻八駿。圉人太僕悉充物。繁纓蹀躞備承黃。服驂纔出躡道旁。吁嗟歎沙復歎玉。效駕不及驢與羊。老驥低頭淚如雨。孫陽滿前不汝覩。薦賢各已受賞歸。且斲枯藍狎薨豎。

和重黎見懷絕句

閉門久學寒蟬噤。一訪長安臥雪家。吏謁未歸鈴下睡。繞簷凍雀啁庭花。卅年寂寞衙參吏。短髮羞簪柱後冠。正是輕陰天欲暮。且同松柏守山寒。玉壺冰合嶰山雪。絕妙蘭臺一卷詩。臥病凝香休暇裏。抱書吟過歲寒時。

題漸西樊山兩集

袁子清言琢冰玉。樊子秀語奪山綠。乾嘉以來百餘年。二妙一時壓尊宿。桐廬梅花三萬株。夷陵清峭天下無。盛年隨計旋通籍。各搜奇偉研京都。嚴灘夾嶂蔽林篠。西峽啼猿楚天曉。故應仙骨常人殊。胎息巖花狎谿鳥。漸西詩版傳玉京。茗樓十集東南行。雲門樊山集亦曰茗花樓詩已分十餘集寫定華嚴合有長者論。卮言聊附鍾嶸評。譬之山耶。袁如峻崖裂冰瀑。樊如白雲生澗曲。譬之水耶。袁如清湍激盤渦。樊如明湖翻碧波。譬之木耶。袁如奇松偃地覆。樊如黛柏參天秀。譬之花耶。袁如苞紫含丁香。樊如猩豔開海棠。譬之果耶。袁如胞

梨寒沁齒。樊如蒲桃爽。無滓。譬之茗耶。袁如芥葉清而妍。樊如越芽翠且鮮。罕譬既窮。喻之食。雋永兼論。味與色。一則江珧兼螭蚌。一則玉鮪金齏。淩世間奇味。不常有。安得日日供膳羞。南能北秀並肩出。丹鳳雌雄孰能識。謬承蘇學競秦黃。敢比韓門論涅槃。鳴珂粉署行珥蟬。花封鳬鳥飛秦川。釐下翠尊暫相聚。門詩寫貴青鸞箋。媿我跛牂附不朽。品隲雲龍笑開口。彩樓更問沈佺期。謂子培銀燭紅鑪賭千首。

次韻重黎見寄

順德李文田仲約

傲吏高情意。屬雲有人蘭澤識。香薰和戎德裕原無策。流涕袁安尙有君。文采長離殊瑋麗。宮商無射感殷勤。旅行衝雪愁無那。悵望柯亭覓斷紋。

擬明季三案詩

恩施樊增祥雲門

挺擊

蠱毒妖書謗未休。青宮白楮更相讎。披猖圍禁成何事。肘腋驩戎政可憂。兄弟故應憐白象。君王不用悔泉鳩。從容爲賦黃臺蔓。勝國誰爲李鄴侯。

紅丸

侍臣催喚進紅鉛。椒掖俄驚玉几寒。方士競言蓬島藥。皇情自信鼎湖丹。御牀輾轉傷魚腹。廷論紛紜諱馬肝。比似春秋嘗藥例。德清欲避董狐難。

移宮

給諫堂堂叩九閭。鸞宮禁卽長門。金輪共戴非臣志。鉤弋長生是主恩。幾見野雞危少帝。不留飛燕啄皇孫。披香禍水知何限。別有茄花蔽至尊。

樵也吟三案詩甚苦再賦三首廣之

挺擊

少海風波極苦辛。狂夫狙擊駭廷臣。羅孤立廣非無意。二五危中亦有因。良娣漫施摘瓜手。威姬終憚采芝人。匆匆具獄平臺上。不對天顏廿五春。

紅丸

口詔忠臣進祕方。閣臣列侍盡倉皇。誤疑一點丹心鍊。豈意千秋玉几涼。不爲遺弓誅柳泌。徒煩請劍斬安昌。春秋九世讎應復。閹樂同天詎可忘。

移宮

舊侍先皇百子池。貞臣深斥武昭儀。乍開暖閣前星出。坐見長門冷月移。定策艱難高霍孟。撤簾力量過韓琦。噉鸞宮井秋風入。帝女黃權亦可悲。

京邸冬日簡爽秋子培

罪屑清言總識真。一時二妙有誰倫。國人競覓狂泉飲。我輩能回狷社春。文字分無蠹室事。帶裘爭及雀臺人。冷官作達休相笑。糲飯寒菹互主賓。